

諭軍機大臣等。本日裕泰奏。拏獲奸細。究出賊勢情形。現在添調官兵。妥籌堵剿。一摺。逆犯鍾人杰等。膽敢戕官。據城威脅。各鄉保正。令其幫助。現在收取鄉間銅鐵。製造軍器。並將各要隘。它斷路徑。設卡拒敵。實屬罪大惡極。必應迅速撲滅。以伸國憲。裕泰現駐咸寧。著提督劉允孝。迅即揀帶精兵。前往會剿。毋稍遲延。致令滋蔓。至崇陽通城各縣。與江西湖南接壤。恐該逆受創後。四路分竄。已降旨由五百里飭令吳文鎔。吳其濬。派委委員。各就所屬認真防堵。又恐湖北省兵力單弱。復降旨由五百里飭令恩特亨額。富呢揚阿。將前經奉旨調集陝甘官兵二千名。趕緊派員管帶赴楚。交裕泰。劉允孝。剋期進剿。以資得力。此等奸徒聚眾憑險。必應及早勦辦完結。方免日久蔓延。該督等務即相機前進。一面設法攻擊。一面解散黨羽。斷不可因地處萬山之中。藉詞延玩。致誤事機。所有此次調派官兵。雇募鄉勇。所需口糧等項。准其籌款辦理。事竣覈實報銷。將此由五百里諭令知之。